



Expediente IET: P-21-180
Proxecto: Parque eólico Monte da Croa
Concellos: Dumbría e Vimianzo (A Coruña)
Promotor: Villar Mir Energía, S.L.U.

INFORME DE IMPACTO E INTEGRACIÓN PAISAXÍSTICA

De acordo co artigo 37.1 da Lei 21/2013, do 9 de decembro, de avaliación ambiental, e co artigo 11.3 da Lei 7/2008, do 7 de xullo, de protección da paisaxe de Galicia, con data do 26/07/2021 a Xefatura Territorial da Coruña da Vicepresidencia Segunda e Consellería de Economía, Empresa e Innovación, achega ao Instituto de Estudos do Territorio (IET) documentación relativa ao proxecto Parque eólico Monte da Croa.

1. Antecedentes:

Con data do 05/05/2021 o Instituto de Estudos do Territorio emitiu un informe sobre este proxecto, no marco do procedemento de avaliación de impacto ambiental ordinaria. Nese informe indicábase que o estudo de impacto e integración paisaxística (EIIP) elaborado non se axustaba ao disposto na Lei 7/2008, do 7 de xullo, de protección da paisaxe de Galicia, e no seu Regulamento. Así mesmo facíanse unha serie de consideracións sobre distintas medidas que debería adoptar o proxecto para minimizar os impactos e acadar unha mellor integración paisaxística.

A documentación achegada pola Xefatura Territorial da Coruña é a contestación da empresa promotora ao informe do IET do 05/05/2021.

2. Marco legal:

Consonte co artigo 15 da Lei 1/2021, do 8 de xaneiro, de ordenación do territorio de Galicia, e co artigo 28 do Decreto 244/2011, do 29 de decembro (modificado polo Decreto 42/2019, do 28 de marzo), o Instituto de Estudos do Territorio (IET) é o órgano competente para emitir este informe en materia de paisaxe, de acordo co que para tal efecto establecen os artigos 32 e 33 do Regulamento para o desenvolvemento da Lei 7/2008, do 7 de xullo, de protección da paisaxe de Galicia (Decreto 96/2020, do 29 de maio).

En desenvolvemento da Lei 7/2008 aprobáronse o Catálogo das paisaxes de Galicia (Decreto 119/2016, do 28 de xullo) e as Directrices de paisaxe de Galicia (Decreto 238/2020, do 29 de decembro).

De acordo co artigo 11.1 da Lei 7/2008, todos os proxectos que deban someterse a declaración de impacto ambiental deberán incorporar no estudo de impacto ambiental un estudo de impacto e integración paisaxística (EIIP), como documento específico no que se avaliarán os efectos e impactos que o proxecto poida provocar na paisaxe e as medidas de integración paisaxística propostas. O contido do EIIP debe axustarse ao disposto no artigo 11.2 da Lei 7/2008 e nos artigos 26 e seguintes do Regulamento da Lei 7/2008.



3. Informe:

A documentación achegada constitúe a actualización do EIIP do proxecto para se axustar ao disposto no artigo 11.2 da Lei 7/2008, do 7 de xullo, de protección da paisaxe de Galicia, e aos artigos 26 e seguintes do Regulamento da Lei 7/2008, e a resposta da empresa promotora a distintas consideracións efectuadas polo IET.

Na contestación da empresa promotora propónse unha alternativa de montaxe para o aeroxerador MC-04, consistente en aproveitar o propio camiño de acceso a esta posición para a instalación da grúa e montar as pas segundo vaian chegando no camiño de transporte, co cal se reduce a plataforma de montaxe prevista e a zona de descarga, diminuíndo a afección aos afloramentos rochosos no Monte da Serra.

En relación aos accesos aos aeroxeradores MC-06 e MC-07, xustifícase a inviabilidade de continuar o camiño existente que parte da máquina MC-05 e conectar coa MC-06, debido á pendente existente, o cal implicaría un movemento de terras maior que no trazado deseñado. Por outra banda, respecto á localización da subestación indícase que se ben o traslado da mesma ao outro lado da liña eléctrica coa que se conecta orixinaría un menor movemento de terra, esta alternativa non sería viable pola afección a distintos bens de interese cultural e a presenza das infraestruturas dun parque eólico.

A addenda presentada pola empresa promotora vén a emendar o EIIP do proxecto, polo que pode considerarse cumprimentado o disposto no artigo 11.2 da Lei 7/2008 e nos artigos 26 e seguintes do Regulamento da Lei 7/2008.

Como xa se tiña indicado no anterior informe, os principais impactos deste proxecto sobre a paisaxe produciranse debido á incidencia visual acumulada, pola sinerxía con outros parques eólicos en explotación, autorizados, ou en tramitación na contorna, sobre os miradoiros próximos, os núcleos de poboación, e as vías de comunicación máis importantes que discorren polo ámbito do parque. Ademais, produciranse impactos sobre elementos de interese paisaxístico, naturais ou construídos, como son os afloramentos rochosos e os valados tradicionais de pedra.

Lémbrese que, de acordo co artigo 30.3 do Regulamento da Lei 7/2008, as medidas correctoras determinadas no EIIP deberán quedar oportunamente recollidas no proxecto.

O xefe do Servizo de Planificación da Paisaxe
José Luís Álvarez Vicente

O director do Departamento Técnico de Estudos
José Antonio Serantes Barbeito

(Documento asinado electronicamente)

